

## C'È-ST-ON BIA MÈSTÎ

Dji vos r'waîte èt m' dimander ç' qui v's-aloz fé di vosse mèstî. Vos, li p'tite Anna, avou vos tch'vias qui tchèyent pad'avant vos-ouys. Vos n' saurîz d'dja lire ci qu'èst scrît au tâblau. Èt vos, Zîré, avou vosse bouche à mitan au laudje trwès-eûres di rote. À qwè tûzoz? Padrî l' finièsse, one mère d'aronde passe ... èle vos vêreut bin stichî on djon.ne di viêr dins vosse bouche. Èt vos, l' grand mau stampé d'Alècsis. Vos qu'a todi one saqwè qui n' va nin. Quand ç' n'èst nin Djan, c'èst Djène. Dji vos vôteûve portant bin veûy tortos al bèsogne, fin binaujes d'yèsse è l' sicole èt rit'nu tot ç' qui dji v's-aure à pris.

Gn-a co, véla asto do radiateûr, li p'tit Colas. Li, i fait tot po yèsse sûr qu'on l' rovîye. C'èst todi ça d' pris don! Djè l'ètind sofler come on soflèt d' fwadje. Nin d'dja awè l' coradje di cheûre sès puces. Rin fé. C'èst ç' qui lî plaît l' mia. Fé l' tchèt on djoû èt s' riv'nu mostrer l' djoû d'après. Dèdja nauji divant di s' lèver m'-n-ome. Qui frè-ti d'mwin? C'è-st-à s' dimander. Sayî d' lî fait comprinde? Nin auji. Èt tofêr yèsse à s' cu po l' fé bouter one tote pitite miète. C'èst disbautchant au d'la dès djoûs qu'i-gn-a ...

Nin on djoû qu'èst l' minme qui l'ôte è l' sicole. On s' lève au matin, on-z-èst d'attaque. Mais on n' sét jamais ç' qui nos ratind.

Audjoûrdu, lès-èlèves sont-st-à mitan paujères, à mitan, di dj'. Èt po ça, gn-a pont d' tchaufadje. Li p'tit Arnaud, one arnauje di prumère, n'èst nin d'acwârd èt l' fé sawè. I djibote come on pèchon qu'aureut yeû stî assatchî par one atrape. One dimèye eûre après, c'èst l'ûlau qui va! On-ègzêrcice avou l's-omes-do-feu ... Gn-a todi one saqwè po fé assoti l' dame di scole. Nin auji, savoz, ç' mèstî-la. 'la co bin qu'on l' tchwèsi ... Rademint 'nn'aler foû do locâl. Dischinde pa l' chaule di fiêr, èt sins r'waîtî sès pîds s'on n' vout nin tchaîr ... Compter on còp, deûs còps sès-èlèves po n'è pont piède èt s' rachoner pad'avant "Lès Contribucions". Ratinde on bon quârt d'eûre qu'on nos féye sine di rentrer. Li p'tit Arnaud, co todi li, n'a rin trové d' mia qui d' rentrer pa l' chaule di fiêr al place d'è raler pa lès montéyes! Dji v' dimande on pau! Grosse tièsse èt rin d'dins!

On-ôte djoû, c'è-st-Ali, li p'tit Marokin, qui s' dispètrone avou l' grand Turc qui n's-a stî avoyî pa on-IPPJ. I s' tignenut èt s' traîtî d' tos lès noms, dins on lingadje qui n' richone nin nosse walon, savoz! Pont d'avance dè l'zî dîre one saqwè, i n'ont nin pus d' choûte qui dès djon.nes di tchins! Èt ça n' sièt à rin di v'lu r'mète li colère do timps d' l'oradje vèyanmint qui d'mwin, s'il astchaît, i sèront come cu èt tch'mîje èt il auront on-arindjemint ètur zèls ... po yèsse mwaîs, tos lès deûs, après vos. Ni jamais taper d' l'ôle dissu l' feu.

Li vinrdi, difin dèl samwin.ne. Lès-èlèves ont d'dja on pîd dins leû wékèn. I sont naujis au d'la, i bauyent sins rat'na èt s' lèyî clouper su leû banc co pîre qui s'il aurin.n' travayî come dès boûs!

Qu'aloz fé di vosse mèstî, Anna, Zîré, Alècsis, Colas èt vos-ôtes, Arnaud, Ali èt tos l's-ôtes? Dji v's-aure scolé èt v's-aprinde à travayî su l'ordinateûr, dji v's-aure à pris à yèsse polis, à yèsse à l'eûre à vosse bèsogne mais ci n'èst nin tot ... Qu'aloz div'nu? Dji mè l' dimande mwints còps.

Dji vôleu si télemint bin qu' vos n' sèrîz nin dès chômeûs come i-gn-a tant au djoû d'audjoûrdu ...

Ci nét-ci, dj'a fait on bia sondje: noste Anna èsteut emplwèyéye aus Contribucions. Zîré aveut trové one place ossi - tchaufêu por on minisse. L'Alècsis, li, il èsteut payî po sayî dès novèlès drogues, divant qu'on lès mète po qu'èle fuchenuche vindûwes dins lès fârmacerîyes. Li Colas, c'èst cantonier qu'il aveut div'nu, quétefiye bin po s' p'lu aspouyî di tènawète su s' chipe tot tûzant au bon tîmps dèl sicole ... Arnaud, djè l'a vèyu su one fwârt, fwârt grande chaule; il èsteut ome-do-feu. I n'aveut jamaîs rovî l' chaule di fiêr di nosse sicole. Èt Ali? Â, Ali avou s' babèye (li qu'aveut stî vacciné avou one awîye d' grafofone), 'l aveut div'nu vindeû. Vindeû d'ordinateûrs.

Quand dji m'a dispièrté, dji m'a dit: "I sont tortos, là, à leû bèsogne ... èt c'è-st-on vraî plaîji d' lès veûy bouter ... Dji n'aveu nin pièrdu m' tîmps minme si, pacôps, i m'aveut choné qui dj' causeu avou lès meurs ...".

A.-M. FRANCOIS